

Ո Ր Ո Շ ՈՒ Մ թիվ 270
Վարչական տույժ նշանակելու մասին

ք. Երևան

«25» հոկտեմբերի 2018թ.

ՀՀ պետական եկամուտների կոմիտեի հետաքննության վարչության պետ Արգիշտի Քյարամյանս, վերանայելով Կարապետ Գագիկի Անտոնյանի վերաբերյալ նյութերը.

Պ Ա Ր Զ Ե Ց Ի

2018 թվականի օգոստոսի 11-ին ՀՀ ՊԵԿ ներքին անվտանգության վարչության աշխատակիցները Բագրատաշենի մաքսային կետում զննության են ենթարկել Վրաստանից ՀՀ ժամանած, ՀՀ քաղաքացի Կարապետ Անտոնյանի կողմից շահագործվող «Nissan Teana» մակնիշի, 34ZN056 հաշվառման համարանիշի ավտոմեքենան և հայտնաբերել վերջինիս կողմից առանց հայտարարագրման ՀՀ մաքսային սահմանով տեղափոխված հետևյալ տեսակի դեղորայքը.

1. տրոկսեվազին – 13 տուփ,
2. միրոպրիստոն – 12 հատ դեղահաբ,
3. սումամեդ – 6 հատ,
4. օմարոն – 90 հատ,
5. ապիդրա – 10 հատ:

Փաստի առթիվ Կարապետ Անտոնյանի նկատմամբ ՀՀ մաքսային օրենսգրքի 203-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն, իսկ հայտնաբերված դեղորայքը վերցվել և ի պահ է հանձնվել «Ձյունիկ տերմինալ» ՍՊԸ մաքսային պահեստ:

Կարապետ Գագիկի Անտոնյանը բացատրություն է տվել այն մասին, որ Թբիլիսիում բնակվում է հորաքույրը՝ Ալվարդ Անտոնյանը, ում տեսակցելու նպատակով հաճախակի իր անձնական օգտագործման «Nissan Teana» մակնիշի, 34ZN056 հաշվառման համարանիշի ավտոմեքենայով մեկնում է Վրաստան: Հերթական անգամ հորաքրոջը տեսակցելու համար 2018 թվականի օգոստոսի 10-ին միայնակ ուղևորվել է Թբիլիսի, տեսակցել հորաքրոջն ու շրջել Թբիլիսիում, որտեղ դեղատներից մեկում նկատել է, որ առկա են իրենց անձնական օգտագործման համար անհրաժեշտ տարբեր տեսակի դեղամիջոցներ՝ ավելի էժան գներով: Որոշել է ձեռք բերել դեղորայքի քանակություն և տանել ՀՀ՝ բացառապես անձնական օգտագործման նպատակով, ուստի Թբիլիսիի դեղատներից ձեռք է բերել 13 տուփ տրոկսեվազին, 12 հատ միրոպրիստոն դեղահաբ, 6 հատ սումամեդ, 90 հատ օմարոն և 10 հատ ապիդրա տեսակի դեղամիջոցներ, որոնք օգոստոսի 11-ին տեղադրել է ավտոմեքենայի սրահում և ուղևորվել ՀՀ: Նույն օրը՝ ժամը 17⁰⁰-ի սահմաններում, մուտք է գործել Բագրատաշենի մաքսային կետ, որտեղ մաքսային տեսուչը զննել է ավտոմեքենայի բեռնախցիկը, տեսել, որ հայտարարագրման ենթակա ապրանքներ չի տեղափոխում և թույլատրել մեկնումը կետի տարածքից: Մաքսային կետի տարածքից դուրս գալուց հետո՝ ելքի ուղեփակոցի մոտ, իրեն կանգնեցրել են քաղաքացիական հագուստով անձինք, ներկայացել որպես ներքին անվտանգության վարչության աշխատակիցներ ու պահանջել ավտոմեքենան տեղափոխել անգար՝ մանրակրկիտ զննություն իրականացնելու համար: Անգարում ավտոմեքենան ենթարկվել է զննության, որի ընթացքում ՆԱՎ աշխատակիցները սրահից հայտնաբերել են իր կողմից Վրաստանից ՀՀ ներմուծված վերը թվարկված դեղորայքը: Քանի որ դրանց վերաբերյալ լրացված չի եղել մաքսային հայտարարագիր,

ուստի իր նկատմամբ կազմվել է մաքսային կանոնների խախտման վերաբերյալ արձանագրություն, իսկ դեղորայքը վերցվել է:

Կարապետ Գագիկի Անտոնյանը միաժամանակ հայտնել է, որ մաքսային կետ մուտք գործելու պահին մաքսային տեսուչն իրեն չի հասցրել հարցնել, թե հայտարարագրման ենթակա ապրանքներ տեղափոխում է, թե ոչ, քանի որ մաքսային տեսուչին մոտենալուց առաջ դեռևս սահմանապահ ծառայության աշխատակցի պահանջով բացել է բեռնախցիկն ու իջեցրել պատուհանների ապակիները, ամեն ինչ տեսանելի է եղել, ուստի զննություն կատարելուց հետո մաքսային տեսուչը կասկածելի ոչինչ չի նկատել և թույլատրել է մեկնումը: Սրահում առկա դեղորայքի մասին մաքսային տեսուչին ոչինչ չի հայտնել և դրանց հայտարարագրման ուղղությամբ որևէ միջոց չի ձեռնարկել, քանի որ այդ պահին իրեն վատ է զգացել և շտապել է հեռանալ, այնուամենայնիվ, ընդունում է, որ թույլ է տվել մաքսային կանոնների խախտում, սակայն ոչ թե դիտավորությամբ, այլ՝ օրենքի չիմացության հետևանքով:

Համաձայն ՀՀ «Փորձագիտական կենտրոն» ՊՈԱ կազմակերպության փորձագետի 17.10.2018թ. թիվ 71481805 եզրակացության՝ փորձաքննությանը տրամադրված ապրանքները հանդիսանում են գործարանային արտադրության 5 անվանում դեղեր, իրենց բաղադրության մեջ թմրամիջոցներ, հոգեմետ նյութեր, պրեկուրսորներ, խիստ ներգործող և թունավոր նյութեր չեն պարունակում, իսկ դրանց շուկայական արժեքը 2018 թվականի օգոստոսի 11-ի դրությամբ կազմել է 157,200 ՀՀ դրամ:

Իրավախախտման անմիջական օբյեկտ հանդիսացող ապրանքների մաքսային արժեքը և դրանց ներմուծման համար սահմանված մաքսային վճարների չափը պարզելու համար 25.10.2018թ. թիվ 13-2/1828759/-18 գրությամբ հարցում է կատարվել ՀՀ ՊԵԿ մաքսային հսկողության վարչություն, որտեղից ստացված 25.10.2018թ. թիվ 8-1/1829826/-18 գրության համաձայն՝ դեղորայքի մաքսային արժեքը կազմում է 131,000 դրամ, իսկ վճարման ենթակա մաքսային վճարների չափը՝ 26,200 դրամ, ինչպես նաև կիրառվում են ոչ սակագնային կարգավորման միջոցներ:

Կարապետ Գագիկի Անտոնյանը 19.10.2018թ. թիվ 13-2/62446-18 ծանուցագրով 2018 թվականի հոկտեմբերի 25-ին հրավիրվել է ՀՀ ՊԵԿ հետաքննության վարչություն՝ իր նկատմամբ սկսված վարչական գործի քննությանը մասնակցելու համար, միաժամանակ նախազգուշացվելով, որ ՀՀ մաքսային օրենսգրքի 219-րդ հոդվածի համաձայն՝ չներկայանալու դեպքում գործի քննությունը կիրականացվի առանց իր մասնակցության:

ԵԱՏՄ մաքսային օրենսգրքի 2-րդ հոդվածի 10-րդ կետի համաձայն՝ «արգելքներն ու սահմանափակումներն»՝ Միության մաքսային սահմանով տեղափոխվող ապրանքների նկատմամբ կիրառվող ոչ սակագնային կարգավորման միջոցներ են: Ոչ սակագնային կարգավորման միջոցները սահմանված են «Եվրասիական տնտեսական միության մասին» պայմանագրի 46-րդ հոդվածով, այն է. «Երրորդ երկրների հետ առևտրում Միության կողմից ընդունվում են ոչ սակագնային կարգավորման հետևյալ միջոցները՝ 1) ապրանքների ներմուծման և (կամ) արտահանման արգելք, 2) ապրանքների ներմուծման և (կամ) արտահանման քանակական սահմանափակումներ, 3) ապրանքների ներմուծման և (կամ) արտահանման բացառիկ իրավունք, 4) ապրանքների ներմուծման և (կամ) արտահանման ավտոմատ լիցենզավորում (հսկում), 5) ապրանքների ներմուծման և (կամ) արտահանման թույլատրական կարգ»:

Դեղամիջոցների դեպքում կիրառվում են ոչ սակագնային կարգավորման միջոցներ, քանի որ դրանք ընդգրկված են Եվրասիական տնտեսական հանձնաժողովի կոլեգիայի «Ոչ

սակագնային կարգավորման միջոցների մասին» 21.04.2015թ. թիվ 30 որոշման 2.14 Հավելվածի ցանկում:

ՀՀ մաքսային օրենսգրքի 203-րդ հոդվածի 1-ին մասի 3-րդ պարբերությամբ սահմանված է. «Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որի արդյունքում առաջանում է ոչ սակագնային կարգավորման միջոցների չկիրառում՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ այդ ապրանքների և տրանսպորտային միջոցների մաքսային արժեքի չափով»:

Այսպիսով, նյութերով պարզվել է, որ 2018 թվականի օգոստոսի 11-ին Կարապետ Անտոնյանն իր կողմից շահագործվող «Nissan Teana» մակնիշի, 34ZN056 հաշվառման համարանիշի ավտոմեքենայի սրահում տեղադրել և առանց հայտարարագրման ՀՀ մաքսային սահմանով տեղափոխել է 13 տուփ տրոկսեվագին, 12 հաբ միրոպրիստոն, 6 հատ սումամեդ, 90 հատ օմարոն և 10 հատ ապիդրա տեսակի դեղամիջոց, ինչի հետևանքով առաջացել է ոչ սակագնային կարգավորման միջոցների չկիրառում, այսինքն՝ Կարապետ Անտոնյանը թույլ է տվել ՀՀ մաքսային օրենսգրքի 203-րդ հոդվածի 1-ին մասի 3-րդ պարբերությամբ նախատեսված մաքսային կանոնների խախտում, այն է՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որի արդյունքում առաջանում է ոչ սակագնային կարգավորման միջոցների չկիրառում, ինչը հիմնավորվում է մաքսային կանոնների խախտման վերաբերյալ կազմված արձանագրությամբ, փորձագետի 17.10.2018թ. թիվ 71481805 եզրակացությամբ, ՀՀ ՊԵԿ ՄՀ վարչության 25.10.2018թ. թիվ 8-1/1829826/-18 գրությամբ և Կարապետ Անտոնյանի բացատրությամբ:

Վերոգրյալի հիման վրա և ղեկավարվելով ՀՀ Մաքսային օրենսգրքի 203-րդ հոդվածի 1-ին մասի 3-րդ պարբերությամբ, 206-րդ և 221-րդ հոդվածներով,

Ո Ր Ո Շ Ե Ց Ի՝

1. Կարապետ Գագիկի Անտոնյանին (ծնված՝ 09.10.1979թ., ազգությամբ հայ, ՀՀ քաղաքացի, միջնակարգ կրթությամբ, բնակվող՝ ք. Երևան, Ֆրունզեի փողոց, 10-րդ շենք, 6-րդ բն., անձնագրի համար՝ AR0433324) ճանաչել զանցառու ՀՀ մաքսային օրենսգրքի 203-րդ հոդվածի 1-ին մասի 3-րդ կետով և նրան տուգանել առանց հայտարարագրման ՀՀ մաքսային սահմանով տեղափոխված դեղամիջոցների մաքսային արժեքի չափով՝ 131,000 ՀՀ դրամ:
2. Որոշման մասին հայտնել Կ.Անտոնյանին, պարզաբանելով, որ այն կայացնելուց հետո 10 օրվա ընթացքում կարող է բողոքարկել վերադաս մաքսային մարմին (ՀՀ մաքսային օրենսգրքի 222-րդ հոդվածի 2-րդ մաս) կամ երկամսյա ժամկետում՝ վարչական դատարան (ՀՀ վարչական դատավարության օրենսգրքի 72-րդ հոդվածի 1-ին մասի 1-ին կետ):

Հետաքննության
վարչության պետ՝



Ա.ՔՅԱՐԱՄՅԱՆ